

Baigorriko kantonamenduko 11 herriek kontseilari nagusi berria hautatuko dute

Eskuin alderdietako hiru hautagai, sozialista bat eta abertzale bat lehian dira

Lutxi Fourcade/ Donibane-Garazi

Marcel Monlong Baigorriko auzapeza eta kontseilari nagusia pausatu zela eta, hauteskundeak iraganen dira berriro igandean Baigorriko kantonamenduan. Hautesleek hautatu beharko dute Paueko Kontseilu Nagusian izanen duten ordezkaria. Irulegiko Irratiak hautagaiak bildu zituen bart.

BAIGORRIKO kantonamenduko bozak urte batez aurretatuak izan dira. Izan ere, urte hasieran Marcel Monlong Baigorriko auzapeza pausatu zen. Auzapez berria izendatu ondoren Baigorri, hauteskundeak iraganen dira kantonamenduko 11 udalerrietan kontseilari nagusia berria izendatzeko.

Kontseilaria ez baldin badute lehen itzulian hautatzen, Baigorriko kantonamenduko hautesleek bi hitzordu izanen dituzte, datoren igandean eta maiatzaren 28an. Lehen itzulian bost hautagai izanen dituzte: hiru eskuin alderdietakoak, bat ezkerrekoa eta abertzale bat (lau gizon eta emazte bat).

Gabriel Dermite itzulera izan da ustekabe handiena. Izan ere, bere kargua utzi ondoren 1994an, lekua eskainiz Marcel Monlongi, inork aurreikusi zuen Ortzaizeko auzapez ohia berriro aurkeztuko zela. Aurreko hitzorduetan, Dermitek gehiengo handia errazki eskuratu zuen kantonamendu osoan.

Antzeko programak

Joera politikoak desberdinak izan arren, bost hautagaiek antzeko programak aurkeztu dituzte. Izan, denek aho batez aldarrikatu dute laboraria laguntzeko beharra, ekonomia sendotzeko nahikaria edo atxikimendua euskal kulturari. Euskarak ere bere tokia izan du kanpainan eta hautagai guztiek agiri elebidunak igorri dizkiete hautesleak.

Aktualitateko gaiak ere ez dituzte baztertu. Esaterako, hautagai guztiak Nafarroa zeharkatuko lukeen autobidearen proiektuaren aurka agertu dira. Ekonomia eta



M. Antoinette Etchebarren, J. Michel Galant eta J. François Tambourin hautagaiek parte hartu zuten irrati saioan

esanak

- ✕ **Jean François Tambourin**(Independentea): «Aipatu den autobidea ez daitaie gure balean pentsa ere! Ez da amensten ahal ere holako biderik baina Iruñera joateko bidea gogoetatu beharko dugu»
- ✕ **Marie Antoinette Etchebarren**(Independentea): «Usatuak gira bederazka lana egitea eta giren heinean, ez dezakegu segitu bakoitza bere xokoan. Izpiritua aldatu beharko dugu jendeen artean.»
- ✕ **Jean Michel Galant**(AB): «Barneko hautetsiak gero eta gehiago ukatuak gira eta indarrak batu beharko ditugu gure boza entzunarazteko Pauen»
- ✕ **Gabriel Dermite**(Independentea): «Euskal departamenduarekin, ez dugu ezer galtzekorik. Hitzemana izan da eta bada garai hitza betetzeko.»
- ✕ **Beñat Minondo**(PS): «Ezkerreko ideiak derauzkat eta ikusten dut parrekoetan eskun aldeko parrasta bat ardura elkar aditzen lanak dituztelarik.»

lan postuak sortzeko beharra ere aldarrikatu dute bostek.

Euskal departamenduaren alde badira ere Galant, Etchebarren eta Tambourin, Dermitek esan zuen kanpainan ez zela aurka. Aldiz, hautagai abertzalea bakarrik euskal presoak Euskal Herri-ratzearen alde mintzatu da.

Kanpaina laburra izan arren, hautagaiek egin ahalak egin dituzte 11 herrietako bozen biltzeko. Biltzar publiko andana antolatzeaz gain, hautagai batzuk ibili dira

etxez etxe, ahanzi gabe telefono deiak.

Eztabaida motela

Irulegiko Irratiak antolaturik, hiru hautagai bildu ziren inguruan bart irrati saio batean. Beñat Minondok ez zion erantzun gonbidapenari, adieraziz lanpetua zela. Gabriel Dermitek, berriz, ukatu zuen parte hartzea irrati saioan, azalduz «bertze hautagaien adixkidea izanik, ez zuela adixkidantza ahul-

tzeko asmorik horrelako eztabaidan parte hartuz».

Hiru hautagaiek kantonamendurako lehentasunak aurkeztu zituzten, besteak beste, laborantza bultzatzeko beharra, ofizialen laguntzeko nahikeria, autobidearen aurkako iritzia edo herri elkargoaren sortzeko beharra.

Hamar hilabeteko kargua

Lehen itzuliaren ondotik ez bada, Baigorriko kantonamenduak hautetsi berria izanen du 28an. Baigorriko hautetsiaren toki hutsa beteko du Paueko Kontseilu Nagusian hamar hilabetez. Hain zuzen ere, bozak eginen dira berriro datorren urtean Baigorriko kantonamenduan.

Hautagaiak

► **Gabriel Dermite** • independentea

Hiru aldiz jarraian hautatua izan ondotik, Ortzaizeko auzapeza ohiak kargu politikoak utzi zituen 1994an. Orain, 61 urteko gizona berriro sartu da politikan. UDF talde zentristatik hurbil izan arren, etiketarik gabe aurkeztu da.

► **Antoinette Etchebarren** • Independentea

Emakume bakarra da. Duela 57 urte sortua, Urepeleko auzapeza da 1977tik eta Baigorriko Baleako sindikatuaren lehendakaria azken 11 urtez. Funtsezkoa jo du herriaren husteari aurre egitea, lanpostuak sortuz. Eskuineko hautagaia izanen da.

► **Jean-Michel Galant** • AB

Laboraria eta ELBko sindikatuaren kidea da. 47 urte ditu, Azkarateko auzapeza 1995tik. *Elgarrekin aitzina* lelopean, Galantek aldarrikatu nahi izan du kantonamenduaren indar bizi guztiak bildu beharra.

► **Beñat Minondo** • Sozialista

Gexan Bidart hautagai sozialista izan ostean bi aldiz, Bidarraiko postako langileak frantses gobernu-ko gehiengoaren bozera-mailea da. Errugbi taldeko buruak ezkerreko baloreak defenditzeko nahia du.

► **J. François Tambourin** • Independentea

Emaitza pollitak bildu ondoren 1994ko bozetan, Baigorriko laborari hau bigarren aurkeztuko da. Egitura aintzitan inplikatu da 48 urteko kristau-demokrata.

OIARTZUNGO UDALA

IRAGARKIA

AUDITORIA LANAK ADJUDIKATZEKO LEHIAKETAREN DEIALDIA.

LEHIAKETAREN XEDEA: 1999-2002 ekitaldietarako Auditoria lanak kontratatzea.

ESPEDIENTEA NON DAGOEN: Udal Informazio bulegoan, astelehenetik ostiralera.

LEHIAKETAREN KOPURUA: 1.600.000 Pzta. (BEZ barne), auditatu/ikuskatutako ekitaldi bakoitzeko.

PROPOSAMENAK AURKEZTEKO EPEA ETA LEKUA: Udal Informazio bulegoan, G.A.O.ean iragarkia argitaratu eta egutegiko 13 eguneko epean.

Oiartzunen, 2000ko maiatzaren 15ean.

ALKATEAK.